



Chüra d'iffaunts *La Structurella*

Scoula cumünela Samedan

Las valuors da la famiglia e da la societad as haun müdedas. Il model tradiziunel da la famiglia vain viepü schlio dad otras relaziuns da vita, da lavur e dad abiter. In bgeras famiglias lavuran tuots duos genituors per pudair sustgnair ils ots cuosts da la vita ubain per schelta. La Vschinauncha da Samedan ho arcugnuschieu l'importanza da sustgnair quista necessited ed ho perque instrado ün müdamaint i'l sistem scolastic in tel sen.

A partir dal december 2023 dess gnir tiers ultra la structura dal di schlargeda eir la chüra illas vacanzas.

In generel

La Structurella spordscha als iffaunts da tuot ils s-chelins da la Scoula cumünela da Samedan üna chüra complementera scolastica e famigliera düraunt tschertas eivnas da las vacanzas da scoula. Ils iffaunts chi frequintan *La Structurella* as haun da tgnair a las reglas da scoula ed haun da respunder las reglas da la persuna da chüra. Scha ün iffaunt violescha cuntinuedamaing las reglas da *La Structurella*, vain tschercho ün discuors cun l'iffaunt e sieus genituors. In cas cha eir üna admuniziun in scrit nu porta ad üngün success, po l'iffaunt gnir exclus. Düraunt la chüra vain discurreu rumauntsch u tudas-ch (linguas da scoula).

Urari d'avertüra

La Structurella es avierta düraunt las vacanzas da lündeschdi fin in venderdi, da las 07.30 a las 18.00 (temp d'entreda 07.30 - 9.00 e temp da sortida 16.30 - 18.00).

Il numer minimel da participants e participantas es tar 4 iffaunts. Scha nu sun avuonda annunzchas, vain la chüra stricheda per quel temp da vacanzas. Maximelmaing paun as participer 20 iffaunts.

Entreda, annunzcha ed absenzas

L'annunzcha ho dad esser fatta il pü tard ün mais aunz il cumanzamaint da la chüra. L'admissiun dals iffaunts succeda tenor entreda da l'annunzcha. In cas da plaina occupaziun vain fatta üna glista da spetter.

Annunzchas tardivas, müdamaints e.u.i. vegnan acceptos in cas excepziunels ed ils cuosts vegnan miss in quint.

Ils iffaunts paun as participar al program da chüra düraunt eivnas interas u eir be düraunt singuls dis. Il program cul tema vain comunicho ouravaunt.

Malatia ed accidaint, sgüraunza

Iffaunts amalos nu paun gnir a *La Structurella*. Sch'ün iffaunt vain amalo ubain ho ün accidaint, schi vegnan ils genituors infurmos uschè svelto scu pussibel. In cas urgients es la persuna da chüra legitimada da dumander dalum agüd al meidi ubain a l'ospidel. Ils genituors pisseran cha lur iffaunt hegia üna sgüraunza sufficianta (sgüraunza da malatia, dad accidaint e da responsabilitad).

Tariffas

Las tariffas da *La Structurella* sun las seguintas: per iffaunt e di resultan cuosts da CHF 55.-. In quist import es inclus la chüra, il manger (catering ospidel, cuschino sves), scu eir üna pitschna marendra la bunura ed il zievamezdi. Eir materiel da zambrager e dad excursiuns es inclus.

Ils predschs vegnan regulermaing controllos ed adattos a las cundiziuns actuelas.

Müdamaints da las tariffas sun pussibels al cumanzamaint da minch'an da scoula.

Quint

Il quint per mincha bloc da chüra vain fat sur il secretariat da la Vschinauncha da Samedan.

Sch'ün iffaunt nu po as participar pervi da malatia, accidaint ubain oters motivs importants, schi es que dad annunzcher dalum a la persuna da chüra responsabla. In cas dad absenzas na güstifichedas vain miss in quint tuot l'import.